



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
27 Novembru 2018

JSMP organiza treinamentu ba Estrutura Suku Usitaco, Naimeco no Lelaufe iha RAEOA kona-ba demokrasia, knaar órgaun soberanu, partisipasaun públiku iha prosesu halo lei no asesu ba justisa formál

Iha 15, 19 no 21 Novembru 2018, JSMP kontinua habelar informasaun kona-ba demokrasia, knaar órgaun soberanu, partisipasaun públika iha prosesu halo lei no asesu ba justisa formal iha jurisdisaun Tribunál Distritál Oecusse (TDO) nian ba membru sira estrutura suku no membru comunidade balun. Suku sira ne'ebé JSMP organiza atividade ne'e mak Suku Usitaco no Lelaufe hosi Postu Administrativu Nitibe no Suku Naimeco hosi Postu Administrativu Pante Makasar.

Treinamentu ne'e ho objetivu; dahuluk atu hasa'e koñesimentu membru konsellu suku no membru comunidade sira ne'ebé iha influénsia iha comunidade kona-ba saida mak demokrásia, kna'ar órgaun soberanu sira idaidak nian, oinsa públiku nia partisipasaun iha prosesu halo lei no asesu ba justisa formál. Daruak mak liuhosi treinamentu ne'e, partisipante sira bele hatutan tan koñesimentu ne'ebé sira hetan ba membru comunidade sira ne'ebé la marka prezensa.

Partisipante sira hosi treinamentu sira ne'e kompostu hosi autóridade suku, membru konsellu suku, membru Konsellu Polísia Komunitariu (KPK) no comunidade sira.

Iha 15 Novembru 2018, JSMP organiza treinamentu iha Suku Usitaco, Postu Administrativu Nitibe ba partisipante sira hamutuk na'in 37 ne'ebé kompostu husi fetu na'in 11 no mane na'in 26.

Iha 19 Novembru 2018, JSMP organiza treinamentu iha Suku Naimeco, Postu Administrativu Pante Makasar ba partisipante hamutuk na'in 30 ne'ebé kompostu hosi fetu na'in 17 no mane na'in 13.

Iha 21 Novembru 2018, JSMP hala'o treinamentu iha Suku Lelaufe, Postu Administrativu Nitibe ba partisipante hamutuk ema na'in 30 ne'ebé kompostu hosi mane na'in 20 no fetu na'in 10.

“Ami fiar katak informasaun sira ne'ebé konstitui iha materia treinamentu ne'e extremamente importante no relevante ba papél no knaar sira estrutura suku no membru KPK sira inklui mós membru comunidade baibain atu hatene. Ida ne'e tanba bele hasa'e sira-nia koñesimentu atu bele asegura dezempenhamentu sira-nia servisu lorloron iha sira-nia comunidade ho efetivu tuir enkuadramentu legál sira ne'ebé iha vigór no mekanizmu sira ne'ebé estabesele ona iha ita-nia nasaun, ” dehan Diretór Ezekutivu JSMP, Luis de Oliveira Sampaio.

Materia treinamentu refere fahe ba iha sesaun rua. Sesaun dahuluk kona-ba demokrásia, knaar órgaun soberanu no partisipasaun públiku iha prosesu halo lei. Sesaun daruak kona-ba asesu ba Justisa formál.

Iha sesaun abertura Sr. Hilario Babo Colo ne'ebé hanesan Xefe Suku Usitaco haktuir katak agradese ba JSMP tanba bele hili ona sira ninia suku hodi hala'o treinamentu no treinamentu ne'e importante tebes ba sira. Sr. Colo hatutan katak durante ne'e problema barak mak akontese iha sira ninia suku, maibé sira la hatene oinsa atu rezolve problema sira ne'e no sira mós laiha kuñesemntu ne'ebé klean kona-ba knaar hosi órgaun soberanu sira. Liutan nia subliña katak aliende problema sira ne'e iha mós problema importante seluk mak kona-ba maluk sira iha suku ne'ebé mate iha 1999 too agora seidak hetan justisa.

Iha parte seluk, Xefe Suku Naimeco nian haktuir katak informasaun sira ne'ebé hetan liuhosi treinamentu ne'e importante tebes ba servisu sira membru Konsellu Suku sira nian. Ne'e duni husu ba membru Konsellu Suku sira atu bele rezolve problema sira iha sira-nia comunidade tuir lei no mekanizmu ne'ebé iha hanesan informasaun ne'ebé hetan hosi treinamentu ne'e no husu atu habelar tutan ba membru comunidade sira seluk.

Kestaun importante sira ne'ebé partisipante sira foti durante diskusaun mak kona-ba direitu no liberdade, partikularmente ba labarik sira ne'ebé mak inan-aman ko'alia ba sira maibé sira lakohi rona, tanba de'it nia iha direitu no liberdade. Situsaun sira ne'e kontribui ba ikus-ikus ne'e labarik feto barak mak isin rua sedu. Se mosu problema hanesan ne'e, ida ne'e oinsa?

Aleinde kestaun direitu, partisipante sira mós foti kestaun devér relasiona ho membru comunidade sira ne'ebé la kumpri sira-nia devér hodi kontribui ba servisu no atividade komunitariu sira iha suku nian no meu saida mak autoridade lokál sira, bele uja? Partisipa sira mós sei kestiona sistema demokrasia ne'ebé estadu adopta no sira prefere aplika sistema monarkia ka sitema liurai ("kerajaan") atu trata no rezolve sira-nia asuntu ka problema iha comunidade laran. Partisipante sira balun mós husu kona-ba demokrasia no direitu, no tanba sa mak povu hili tiha deputadu sira no depois sira foti desizaun ida ne'ebé la tuir povu nia hakarak hodi kria situasaun polítika ne'ebé halo povu nafatin sai vítima.

Hatan ba kestaun ne'e, JSMP esplika katak direitu no liberdade nu'udar valór sira ne'ebé iha Estadu Direitu Demokrátiku hetan protesau hosi Konstituisaun no lei sira. Direitu no liberdade ne'e mós iha nia limitasaun no responsabilidade ne'ebé regula mós iha Konstituisaun no lei. Ne'eduni, direitu no liberdade ema ida nian hotu, bainhira ema seluk nian hahú, katak la iha ema ida ezerse nia direitu no liberdade hakat liu fali ema seluk nian. Preokupasaun sira kona-ba labarik sira ne'ebé la rona inan-aman ne'e, naturalmente akontese iha fatin hotu-hotu. Ida-ne'e halo parte hosi evolusaun no desenvolvimentu umanu hosi faze infantil ba faze adolsente no ne'e la'ós tanba direitu no liberdade.

Enkuantu kestaun devér, JSMP esplika katak membru comunidade sira iha devér atu kontribui ba servisu no desenvolvimentu iha comunidade. Bainhira membru comunidade sira la kumpri sira-nia devér, líder ka autoridade komunitariu sira la nesesariamente uza meu violénsia hodi obriga membru comunidade sira hodi halo tuir sira-nia devér. Tanba iha kualkér forma violénsia sei konstitui nu'udar krime. Saida mak importante atu autoridade komunitariu sira halo mak halo konsiensializasaun ba membru comunidade sira kona-ba importánsia kontribuisaun ema hothotu nian ba desenvolvimentu nasional liuhosi desenvolvimentu suku iha tempu ukun-an.

Relasiona ho kestaun kona-ba uza sistema tradisionál ligadu ho monarkia hodi trata ka rezolve problema sosiál sira, JSMP esplika katak ita-nia Konstituisaun proteje lisan ka kultura sira ne'ebé la kontráriu ho Konstituisaun no lei. Bainhira suku sira ne'e uza sistema tradisionál sira ne'ebé la kontráriu ho Konstituisaun, lei no prinsípiu sira direitu umanu,nian ne'e la iha problema.

Enkuantu kestaun demokrasia no direitu, JSMP esplika katak demokrasia ne'e hanesan espasu ida ne'ebé fó dalan ba direitu sira moris no buras. Iha nasaun sira ne'ebé la'ós demokrátiku, ema nia direitu sira lakon no mate no so de'it estadu mak iha direitu atu impoin direitu tuir estadu nia interese ne'ebé maioria kontráriu ho interese sidadaun sira nian.

Ba asuntu sira ne'ebé relasiona ho desizaun deputadu sira-nian la tuir povu nia harak, JSMP haktuir katak, tuir loloos desizaun hothotu ne'ebé deputadu sira foti iha Parlamentu Nasionál tenke refleta interese no aspirasaun povu nian tanba povu mak fó podér ne'e ba sira liuhosi eleisaun. Iha demokrasia povu mak na'in ba podér ne'e no deputadu sira foti desizaun reprezenta ka lori povu nia naran. Maibé dala barak polítika ka deputadu sira foti desizaun tuir sira-nia interese ka interese partidu nian hodi ignora tiha interese povu tomak nian. Tanba ne'e, se iha oportunidade seluk ne'ebé bele avalia fali situasaun sira ne'e iha tinan lima mai liuhosi eleisaun jerál hodi bele hili partidu no ema sira ne'ebé hakarak duni servi rai no povu ne'e.

Iha parte asesu ba justisa formál, partisipante sira levanta kona ba kestaun violénsia doméstika ne'ebé mak akontese iha familia no ikus mai rejulta soe malu no abandona labarik sira. Aleinde partisipante sira mós apresenta kestaun kona-ba arguidu sira ne'ebé komete krime no hetan de'it suspensaun, maibé durante suspensaun se ema seluk komete fali krime hasoru nia, oinsa ho nia prosesu?

JSMP esplika katak bainhira akontese violénsia doméstika tantu komete husi laen ba feen ka husi membru familia ida kontra membru ida seluk ida ne'e tuir lei konsidera hanesan natureza krime públiku. Nune'e se de'it mak haree krime ida ne'e akontese tenke ba hato'o denúnsia ba iha instituisaun relevante sira hanesan ba Polisia ka ba Ministeriu Públiku. Krime ida ne'e kualkér se de'it labele ba dada fila fali no nia desizaun ikus tenke mai duni husi tribunal. Enkuantu ba kazu divórsiu ida ne'e buat ketak ida no nia prosesu tenke liu husi prosesu sivil. Ema ne'e tenke buka advogadu atu prepara nia prosesu ba tribunál.

Relasiona ho abandona oan, tuir lei permite inan husi oan sira atu bele ba hato'o keixa iha Ministériu Públiku atu bele komesa prosesu kasu refere. Tuir artigu 225 Kódigu Penál konsidera hanesan krime la halotuir obligasaun alimentár. Artigu ne'e define katak ema ne'ebé iha obligasaun atu fó alimentu no iha kondisaun atu halo tuir obligasaun ne'e maibe la halo tuir obligasaun ne'e to'o hamosu perigu ba alimentadu atu laiha meiu hodi satisfáz nia nesesidade fundamentál, maske ema seluk hadok tiha perigu ne'e, sei hetan pena prizaun too tinan 3 ka multa.

Wainhira ema ruma hetan tiha pena prizaun maibé suspende no iha suspensaun nia laran mak ema seluk komete fali krime hasoru ita ninia prosesu mak, ita tenke ba hato'o keixa iha polisia ka Ministériu Públiku atu bele prosesu ninia foun ne'e. Kazu ne'e independenmente hosi kazu seluk ne'ebé nia estatutu suspendidu.

JSMP observa katak partisipante sira hatudu interese atu partisipa iha atividade treinamentu ne'e tanba konsidera katak sira maioria foin mak primeiraves hetan oportunidade atu tuir treinamentu ho topiku espesifiku iha area asesu ba justisa nian.

Atividade ne'e hetan apoiu hosi Governu Austrália liuhosi Embaixada Austrália iha Timor-Leste
Atu hetan informasaun liutan favor kontaktu direktamente:

Luis de Oliveira Sampaio
Diretór Ezekutivu JSMP
Diresaun e-mail: luis@jsmp.tl
Telefone: 3323883 | 77295795